

# Daniæ tertia Tabula, In qua Slesvicensis Ducatus pars & Holsatia.

Ducatus Slesvi-  
censis.  
Unde dicatur.  
Imperium majo-  
rum.

Opida.

Senatores.

Holsatia.  
Unde dicta.

**H**ÆC de Iutia Septentrionali; sequitur *Meridionalis*, quæ veteribus, quod a reliqua Germania per Albim fluvium ad Boream divulsa sit, atque interclusa, *Nordalbingia* est dicta. Ea duos ducatus Slesvicensem & Holsatiæ complectitur, de quibus ordine nobis est dicendum. Ducatus Slesvicensis a Metropoli & per vetusto Emporio Slesvico nomen habet. Olim hæc regio *Ducatus Iutia*, dicebatur, quæ Waldemarus Abelis Regis Daniæ Pronepos primus in feudum accepit ab Erico Rege circa annum 1280. Exstincta autem Regum ac Ducum stirpe mascula, & Ducatu Slesvicensi cum regno in unum redintegrato ac consolidato, *Margarita* trium Regnorum Regina ducatum Slesvicensem permisit *Gerardo* Comiti Holsatiæ, hac conditione, ut a rege Daniæ collatum beneficium recognosceret. Caterum civitates Ducatus Slesvicensi subjectæ quia iisdem cum Danis gaudent privilegiis, eodem quoque jure cum iis utuntur. Subditi a sententiis Magistratum cujusunque loci ad Principes ac eorum Senatores possunt provocare & non ultra, ut privilegiis cautum est. Generalis autem gubernatio horum Ducatum Regi Daniæ ac Adolpho Duci Holsatiæ incumbit, & per vices ab uno ad alium transfertur. Proinde cum ad Regem devolytur, Regiæ suæ Majestatis nomine per *Henricum Rantzovium* Vicarium Regis administratur. Præcipuum hujus Ducatus Opidum *Slesvicum* vulgo *Schleswick*. Germanicæ originis nuncupationem habet, ob situm, quem ad Sliam, in maris Balthici sinu obrinet. *Wickenim* & Opidum, & incurvum Maris recessum, sive sinum; & Vicum etiam prisca Saxonibus sonat. Quæmadmodum *Becanus*, in suis *Gotodanicis* observavit, *Crantzius* & qui Saxonum conscribere historias, aliam Slesvico appellationem attribuunt, quam etiamnum apud Danos & Frisios usus retinere videtur. Hi enim sua lingua hoc Opidum *Heidebui* vel *Heideba* nuncupant, eo quod a quadam Daniæ Regina, cui *Hethæ* nomen, dicant primitus esse conditum. Est autem peropportunum ad negotiationem situ, Portum habens ad exercenda commercia, commodissimum. Non procul ab hoc Opido *Gotorpia* arx sita est. Telonium hic celebre, ubi compertum, fertilibus annis ex *Dania* *LM Boum*, in *Germaniam* abacta vestigal solvisse. Est & in hoc ducatu *Flenzburgum*. Opidum celebre, hoc inter Montes excelsos, littori Maris Orientalis adjacet, in quod ejus Portus se extendit, tanta commoditate, profunditate & securitate, ut singuli fere cives ex domibus suis navæ mercibus implere, & easdem rursus exonerare possint. Sunt & *Husenum*, *Haderslebia*. Habet unum hic Ducatus Episcopatum Slesvicensem: Capitula duo, Monasteria tria: Castra tam Principum, quam Nobilium varia. Ordo autem Senatorum cujus iam aliquoties facta mentio plerumque constat numero *xxiiii* personarum equestris ordinis, quibus adhibetur generalis Cancellarius, nec non nomine uniuscujusque Principis duo Iuris Doctores.

## Holsatia Ducatus.

*Holsatiam*, a silvarum saltuumque frequentia, quibus commune cum lignis nomen in lingua indigena est (nam & silvam & lignum promiscue *Holt* Cimbri ac Germani inferiores dicunt) nomen obtinere arbitrantur. Et